



Rabu, 05 April 2023
Ogen: Hosea 13:1-16



Masap Desken Remang Erpagi-Pagi



Desken remang erpagi-pagi,' desken remang Dolu, enda kuan-kuan si nuriken gambaren kerna si la erbekas, la lit tinadingna. Iteruh deleng Sibayak, cuaca si mbergeh, lalap lit remang (kabut) tapi sanga reh las matawari minter bene remang ndai.

Bage me Hosea ngidah kalak si la patuh man Dibata. Ikatakenna masap me bangsa e desken remang erpagi-pagi. Nuriken kerna kegeluhen manusia e me:

- bagi namur si enggo kerah erpagi-pagi, kenca berngi lit me namur si lit i taneh tah i dukut. Kenca erpagi-pagi reh las matawari kerah la erbekas namur ndai
- bagi nggala siembusken angin i bas pengeriken, la lit gunana, entah ku ja pe perkabangna la lit si nulu-nuluisa.
- bagi cimber i bas dapur nari, kenca ranting e gara, cimber ndai pe bene

Kerina belas-belas enda nuriken kuga bangsa e nembehna ate Dibata. Bangsa si la meteh mehuli, la ngasup ngataken bujur. Desken kacang lupa nandangi kulitna. Bangsa e ibaba Dibata i Mesir nari, ipekna-kenana tapi kenca seh i taneh siipadanken man nini-ninina nai, enggo besur dengen puas ia. Meganjang ukurna dengen lupa ia nandangi Dibata, si berjasa i bas geluhna. Tangkas kuga rawana Dibata nandangi bangsa enda e maka bahasa ras belas-belas si isehkenna tuhu man kebiarenken. Ijerngem desken singa, igempangi arimo i bas dalan, irigep, igempangi, icaing-caing ras itelen. Bage me rawana Dibata man bangsa enda e maka lanai bo lit dalan puluh, tuhu-tuhu kebiaren si jadi.

Ula kal silegi rawa Dibata, keleng ateNa e seh kal belinNa. Jeralah, dosanta pe banci masap desken remang erpagi-pagi.